

# 雙連坡詩稿

## 秋夜自研究室歸宿舍

夜深秋意本來多，松影無端傍女蘿。卻望雙連坡上月，曾搖打狗港邊波。情隨景換真成趣，事逐人來不奈何。還笑小才同燕雀，啣書斗室自營窠。

2008.09.26

## 2008年教師節於雙連坡懷楊師

山雨浪浪洗世塵，獨於佳節憶師頻。沈吟十五年間事，瀟灑三千界裡身。楊震學霑秦子弟，鍾繇書授衛夫人。薛潭畢業成名後，常嘆秦青技巧新。

按. 楊師師承汪中夫子，故有鍾繇書授之句。

2008.09.28

## 文學院中見天高月小，因懷內子

時過中秋三十日，疏風淡雨偶沾襟。孤燈斗室經年客，皓月千松一夜心。柳絮高才堪著述（內人此時正撰寫博士論文），鱸魚風味動沈吟。我攻白傅君山谷，宋調唐音各自尋。

2008.10.13

## 深夜於研究室夜讀

走板雙丸日復東，書生事業意無窮。強開倦眼窺賢聖，又索枯腸覓句工。此地應成終老地，庭松聊作伴眠松。屠龍技法堪惆悵，夜憶吾師一世功。

2008.10.19

## 秋晚閑行至中大湖畔

秋陰無故滿長天，獨繞湖邊看水煙。本為散愁來此地，風前卻嘆近中年。

2008.10.26

### 夜訪僚友

我到中央滿五旬，逢君一見即相親。從容夜訪成濡沫，蕭灑高談抖世塵。論學偶聞松韻響，感時常嘆歲華新。風流往事均堪憶，與子同為好古人。

按. 與僚友論及中央中山師長韻事及中文學界現況，故有末聯

2008. 10. 26

### 立冬後一日有作

昨日立冬渾不覺，今朝煙霧雨濛濛。重陰易閉迷離眼（余每逢陰雨天常倦而欲眠），溼氣難禁魯莽風（雙連坡雨天常有風）。爽颯秋天從此去，蕭條功業竟年空。無惊默坐憑窗望，心羨長青自在松。

2008. 11. 8

### 初冬小疾

萬里重陰景物闌，冬風帶雨射眸酸（北部寒流常帶風雨）。微軀已受陰陽迫，浩氣猶堪溼冷寒。斗藪俗情觀疾病，徘徊要路笑蹒跚。維摩詰病心長羨，一室生香滿座歡。

2008. 11. 24

初冬於研究室午寐，忽夢大學同學於中山情事，俄然醒覺，猶有滋味，靜而思之，悵惘若失，因以廿韻紀之

臥疾松齋下，魂魄遊華胥。夢中青春事，滋味似醍醐。課後邀午食，談笑甘菜蔬。眼中無勢利，心下鄙腐儒。彼此懷大志，言語互揶揄。冬晚斜陽落，山海縱馳驅。平濤來復去，岸澗灘沮洳。海科院旁石，赤足越崎嶇。山風兼海風，吹髮暫須臾。斗藪俗塵慮，微陽照空虛。當時玄髮柔，皓齒素顏朱。冷眼觀世人，傲骨自沫濡。堪為莫逆交，志同道不孤。中山盈銳氣，養真忘前途。浩然望大海，縱橫慕鯨魚。俄而吾夢覺，斗室置微軀。支離友何在？少年事都無。環顧四壁立，鄴架滿櫥書。同學散南北，十載情不殊。他年同聚首，白鬢且唏噓。

2008. 11. 26

### 冬日鮮暖白燦，疾小愈而出門望之

晶瑩冬日暖肌膚，微恙夷瘳景亦殊。獻曝心情多寂寞，折肱經驗少糊塗（北上以來，三遇寒流而三受寒，今始知保暖重要）。形骸變化隨年有，意氣消磨逐日無（年長閱廣後，深覺學術之爭在道理而不在意氣）。守得陰霾風雨後，晴來病去且歡娛。

2008.12.10

### 冬夜獨坐

滿山松韻響，寂寞掩書時。閉目思前事，增寒詠舊詩。俗情多變化，素志少猶疑。一歲行將盡，來春盼展眉。

2008.12.18

### 冬至隔日清晨離家赴雙連坡

一年冬至夜，別後日初長。冷雨霜風裡，青雲志若忘。

### 平安夜於雙連坡思內子

耳際頻聞聖誕歌，團圓消息遍山坡。松林夜色增寒意，溪水華燈映薜蘿（中央聖誕節時於百花川兩側佈置千燈）。厭看遊人成伴侶，閑思往事憶青娥。今宵又是孤單客，寥落心情幾許多。

2008.12.24 夜

### 2009 年元旦二首

已嘆新年奈若何，浮生景緻且摩娑。亭亭玉樹蒼松老，籍籍英聲國士多（此聯敘中央所見物與人）。貧賤依然陳仲子，嘿逃猶是魏荊軻。於今土偶微微笑，去歲還憂梗泛河。

聲名深愧任吹噓，且喜資藏共五車。白傅右丞塵外句，紅樓左傳枕邊書。三冬島內無搖落，一歲心中有慘舒。可笑新年歸不得，猶提食指畫空虛。

### 龔師榮退宴後有作

九畹滋蘭執上庠，吾師賺得滿庭芳。眼前歲月翻書過，身外榮名帶笑忘。載

酒侯芭頻學問（余常造訪老師台南寓所），懸車白傅好倘佯（樂天詩：宦途事了是懸車）。傳經著述成功業，附驥生徒面亦光。

### 春日憑窗三首

春風春雨入窗來，眺望陰霾冷似灰。樓下行人如過客，無情不管杜鵑開。  
久客鯤南不慣寒，三春氣息滿山巒。風輕雨潤饒生意，松樹生煙過葉端。  
一春風雨慰無悵，草色連綿碧綠松。最喜杜鵑藏樹下，與吾相對兩龍鍾。  
2009.3.6 午

### 假日撰寫論文淹留研究室不歸

坐困書城類楚囚，滿窗春色暫凝眸。薄陰未暗桓溫樹，清冷猶侵晏子裘。意緒聊隨花綻放，心神已共燕遨遊。興來高詠終何益，身外浮名不繫舟。  
2009.3.7

### 春晴有懷

春日暖徐傾，風光滿眼明。杜鵑三色野，凡鳥數聲清。粗算生涯計，薄諳世事情。老松經雨後，標格自崢嶸。  
2009.03.20

### 春分時節見杜鵑恣意浪漫口占一絕

東風澹淡暖晴天，每到春分益惘然。默數花開餘幾日，山櫻零落杜鵑鮮。  
2009.3.22

### 春深午憩，醒後不知身處何地，以詩自哂

天寒無氣力，溼冷眼難開。靜臥春歸去，酣眠夢暫來。黑甜耽物化，塊磊轉悠哉。一覺黃昏暗，忘身卻自哈。  
2009.3.30

### 放言詩一首寄友人

慣從白眼傲紅塵，青眼猶憐負氣人。曲直是非心斷定，喜憂好惡色溫馴。一車蕙苾成飛謗，舉世風流效淺顰。腐鼠珍饈差可笑，鴟梟卻忌鳳鷄身。

2009.4.7

### 春深見杜鵑零落有懷張太老師

釀寒溼意化春煙，細雨殘花倍黯然。過眼風華尋看盡，留心雅事憶從前。人間病有維摩詰，流輩詩尊白樂天(樂天晚居洛下，風痺病後之詩，格調益高，為時人尊尚，太老師病歸新店，吟詠不綴，事與功俱似樂天)。杜宇十分鮮豔後，於今骨格亦嬋娟。

2009.4.7

### 與友人觀月論詩

兩袖帶詩情，來尋霽月明。與君肝膽語，令我骨神清。是處乾坤白，同襟意氣傾。吾儕尊老杜，千載有餘聲。

2009.4.9

### 止酒詩

俸錢雖不薄，書肆恣揮霍。快意蒐典墳，生計彌束縛。花費算錙銖，無奈停杯杓。沉沉清夜中，悲歡無所託。送春春欲盡，惆悵想花落。空有餞春心，所欠唯一勺。畢卓持蟹螯，陶巾漉酒酌。大醉六十日，阮生餘裕綽。畫餅飢猶在，酒渴情懷惡。況我客中壘，無棕厭寂寞。終日無人語，惘惘意蕭索。平生志雖在，氣慨成落拓。壘塊積胸中，五臟無由淪。雖有同心人，南北隔寥廓。且飲聖與賢，獨言語諤諤。今朝無資蓄，亦將棄此樂。電話告萊妻，勸我進匏爵。憐我一身單，謀食類屈蠖。簡省衣妝費，換酒慰神魄。得意笑劉伶，祝酒變然諾。

2009.4.11

### 雙連坡春晚

時節已過三月半，芳菲翠碧憑欄看。迤邐鳥言鳴錯落，天宇清曠雲霧散。十分春色餘二分，一歲紅紫漸成塵。不須滄桑成變化，花開花落即傷神。最是杜鵑零落時，無語默默花別枝。兼旬春意一朝盡，曲陌樹下紅離披。文學院

裡茶花好，落紅參差襯芳草。朝夕相逢心眼開，春天漸老身亦老。少年早已別我去，猶戀繁華青春味。花事到頭變南風，經眼綺麗足堪慰。顧我羈旅長顛顛，學問事業常坎壈。苦棟紫雪送春歸，獨坐池邊待菡萏。

2009. 4. 12

### 雙連坡憶大學同學

書齋獨坐思毵毵，閉目每憶天之南。海隅似鎖少年魄，放浪氣味今猶耽。長堤攜手戀明月，天水一色心神恬。逡巡燈塔不忍去，流光逼仄如長鎌(吾常與同學於李商隱課後，步長堤，玩明月，其時水月如練，逼人而來)。移時步影臥紅樓(中山大學學生宿舍盡紅磚所建)，湔洗胸次曉夢甜。春深遂驚漸老大，才識不足年頻添。學詩嘯傲慰寂寞，雛鳳吐屬驪珠含。得遇名師吾輩幸，筆取萬象恣貪婪。榮名身外志何有，卻羨叔夜七不堪。觸藩那顧眾人笑，好古鄙俗稱狂憨。當年歧路一分手，慘綠氣慨成煙嵐。風吹二子客京洛，吾伴夫子坐山崦。浮雲十二年改易，世事情態知涼炎。麻姑能見滄海變，流輩記憶唯青衫。今宵連坡月華麗，思緒起落嘗酸鹹。清光情誼堪沈醉，不須美酒心亦酣。

2009. 4. 12

### 蒙張太老師次韻拙詩，依前韻奉和

早知浮世若雲煙，詩卷吟來也喟然。夢裡乾坤還有戀，筆端造化自無前。感傷憶往多成憾，坐忘齋心不愧天。遙想去冬長晤語，殷勤勉我意娟娟。

2009. 4. 15